

I Z V J E Š T A J

O RADU OPĆINSKOG NAČELNIKA ZA 2007.godinu

Živinice, februar 2008.godine

I UVOD

Na osnovu Ustava BiH, Zakona o principima lokalne samouprave u Federaciji BiH ("Sl. novine FBiH", br.49/06), a u skladu sa članom 59. Statuta Općine Živinice – prečišćeni tekst ("Službeni glasnik općine Živinice" broj: 4/01), općinskom vijeću Živinice podnosim Izvještaj o radu za 2007. godinu.

Lična karta Općine

Općina Živinice, kao osnovna jedinica lokalne samouprave, formirana je Odlukom Narodne skupštine NR Bosne i Hercegovine, broj:28/59, 19. juna 1959.godine. Danas obuhvata područje od oko 300 km² na kome trenutno skupa sa prognaničkom populacijom, nakon izdavanja novih dokumenata po CIPS programu, po realnoj procjeni živi oko 80.000 stanovnika. Od ukupno 11.000 prognanika, njih oko 3.000 još uvijek nema uslove da se vrati na svoja ognjišta sa kojih su prognani ili izbjegli tokom agresije na našu zemlju. Preostalih oko 8.000 prognanika situiralo se u Živinicama, riješilo stambeno pitanje, zaposlilo se ili razvilo privatni biznis i ima namjeru ostati trajno u Živinicama. Na području općine konstituisano je 26 mjesnih zajednica, od kojih četiri čine gradsko naselje. Prema procjenama, u gradu i prigradskim naseljima živi oko 24.000 stanovnika, što je u odnosu na predratni period skoro udvostručen broj.

Nadležnosti Općine

Prema Evropskoj povelji o lokalnoj samoupravi, lokalna samouprava je oblik odlučivanja i upravljanja u manjim lokalnim zajednicama na užoj teritoriji, neposredno od strane njenih stanovnika ili od strane njihovih predstavnika koje oni, na osnovu općeg i jednakog prava glasa, neposredno biraju. Za razliku od državne uprave, za koju je karakterističan hijerarhijski odnos, podređenost nižih organa višim i centralizacija u djelovanju, primarna obilježja lokalne samouprave su samostalnost u odlučivanju o pitanjima koja su tradicionalno u nadležnosti organa lokalne samouprave, a što sve ukupno doprinosi razvoju demokratizacije u pogledu političkog upravljanja i odlučivanja na ovom nivou društvene zajednice.

Po Ustavu Federacije BiH, općina je definisana kao jedinica lokalne samouprave. Ustav Federacije BiH je izričit u tome da se u općini ostvaruje lokalna samouprava i to detaljno naglašava kroz odredbu o nadležnosti općinskog Načelnika, prema kojoj je on nadležan za provođenje općinske politike i izvršavanje općinskih propisa, kao i obavljanje svih poslova koje na općinu prenesu kantonalna i vlast FBiH.

Novi Zakon o principima lokalne samouprave u Federaciji BiH jasno definiše da se općina ima pravo osim vlastite nadležnosti ustanovljene Ustavom, baviti i svim pitanjima od lokalnog značaja koja nisu isključena iz njene nadležnosti, niti dodijeljena u nadležnost neke druge vlasti na osnovu Ustava i zakona. Isti Zakon takođe definiše da je općina samostalna u odlučivanju o pitanjima iz vlastitih nadležnosti i da ove nadležnosti ne mogu biti ograničene ili uskraćene od federalnih ili kantonálnih vlasti.

U vlastite nadležnosti jedinice lokalne samouprave posebno spadaju:

- osiguranje i zaštita ljudskih prava i osnovnih sloboda u skladu sa Ustavom,
- donošenje budžeta jedinice lokalne samouprave,
- donošenje programa i planova razvoja jedinice lokalne samouprave i stvaranje uvjeta za privredni razvoj i zapošljavanje,

- utvrđivanje i provođenje politike uređenja prostora i zaštite čovjekove okoline,
- donošenje prostornih, urbanističkih i provedbenih planova, uključujući zoniranja,
- utvrđivanje i provođenje stambene politike i donošenje programa stambene i druge izgradnje,
- utvrđivanje politike korištenje i utvrđivanja visine naknade za korištenje javnih dobara,
- utvrđivanje i vođenje politike raspolaganja, korištenja i upravljanja građevinskim zemljištem,
- utvrđivanje politike upravljanja i raspolaganja imovinom jedinice lokalne samouprave,
- utvrđivanje politike upravljanja prirodnim resursima jedinice lokalne samouprave i raspodjele sredstava ostvarenih na osnovu njihovog korištenja,
- upravljanje, finansiranje i unapređenje djelatnosti i objekata lokalne i komunalne infrastrukture,
- vodosnabdijevanje, odvođenje i prerada otpadnih voda,
- prikupljanje i odlaganje čvrstog otpada,
- održavanje javne čistoće,
- gradska groblja,
- lokalni putevi i mostovi,
- ulična rasvjeta,
- javna parkirališta,
- parkovi,
- organiziranje i unapređenje lokalnog javnog prijevoza,
- utvrđivanje politike predškolskog obrazovanja, unapređenje mreže ustanova, te upravljanje i finansiranje javnih ustanova predškolskog obrazovanja,
- osnivanje, upravljanje, finansiranje i unapređenje ustanova osnovnog obrazovanja,
- osnivanje, upravljanje, unapređenje i finansiranje ustanova i izgradnja objekata za zadovoljavanje potreba stanovništva u oblasti kulture i sporta,
- ocjenjivanje rada ustanova i kvaliteta usluga u djelatnosti zdravstva, socijalne zaštite, obrazovanja, kulture i sporta, te osiguranje finansijskih sredstava za unapređenje njihovog rada i kvaliteta usluga u skladu sa potrebama stanovništva i mogućnostima jedinice lokalne samouprave,
- analiza stanja javnog reda i mira, sigurnosti ljudi i imovine, te predlaganje mjera prema nadležnim organima za ova pitanja,
- organiziranje, provođenje i odgovornost za mjere zaštite i spasavanja ljudi i materijalnih dobara od elementarnih nepogoda i prirodnih katastrofa,
- uspostavljanje i vršenje inspekcijuskog nadzora nad izvršavanjem propisa iz vlastitih nadležnosti jedinice lokalne samouprave,
- donošenje propisa o porezima, naknadama, doprinosima i taksama iz nadležnosti jedinice lokalne samouprave,
- raspisivanje referenduma za područje jedinice lokalne samouprave,
- raspisivanje javnog zajma i odlučivanje o zaduženju jedinica lokalne samouprave,
- preduzimanje mjera za osiguranje higijene i zdravlja,
- osiguranje uvjeta rada lokalnih radio i TV stanica u skladu sa zakonom,
- osiguravanje i vođenje evidencije o ličnim stanjima građana i biračkih spiskova,
- poslovi iz oblasti premjera i katastra zemljišta i evidencija o nekretninama,
- organiziranje efikasne lokalne uprave prilagođene lokalnim potrebama,
- uspostavljanje organizacije mjesne samouprave,
- zaštita životinja

Najvažnija novina definisana je članom 11. pomenutog Zakona po kome se prenos i povjeravanje novih poslova jedinicama lokalne samouprave mora propratiti dodjelom sredstava potrebnih za njihovo efikasno obavljanje.

II ORGANIZACIJA LOKALNE SAMOUPRAVE

Organi općine kao jedinice lokalne samouprave su općinsko vijeće i Načelnik. Općinsko vijeće je predstavničko tijelo građana i ono u skladu sa zakonskim i statutarnim ovlaštenjima donosi odluke iz svoje nadležnosti. Članovi Vijeća odgovaraju za ustavnost i zakonitost akata koje Vijeće donosi u okviru svojih nadležnosti.

Izvršni organ jedinice lokalne samouprave je općinski Načelnik (u gradu gradonačelnik) i on odgovara za ustavnost i zakonitost akata koje donosi u svojoj nadležnosti, odnosno predlaže općinskom vijeću.

Međusobni odnosi Vijeća i Načelnika zasnivaju se na principima međusobnog uvažavanja i saradnje, uz pojedinačnu odgovornost za ostvarivanje vlastitih nadležnosti i zajedničku odgovornost za funkcioniranje jedinica lokalne samouprave.

Reforma javne uprave u Bosni i Hercegovini ne svodi se samo na prilagođavanje organizacijske strukture odredbama Zakona o državnoj službi, već se kroz GAP (*Government Accountability Project- Projekat upravne odgovornosti* koji je osnovan i pretežnim dijelom finansiran od strane USAID-a), općinska administracija nastoji učiniti profesionalnom i efikasnom. Naime, kroz ovaj program, općina ima mogućnost da nabavkom nove informatičke opreme i provođenjem raznih edukativnih aktivnosti usmjerenih prema zaposlenicima organa uprave, dođe na viši organizacioni i stručni nivo, a sve u cilju bržeg i lakšeg obavljanja poslova zbog kojih i postoji, a to je ostvarivanje prava građana po različitim osnovama.

Najznačajniji korak u praktičnom provođenju ovih opredjeljenja je stavljanje u funkciju Centra za pružanje usluga građanima (Šalter sale) gdje građanin može dobiti sve na jednom mjestu za vrlo kratko vrijeme čime se postiže veći nivo zadovoljstva građana, a znatno smanjuje korupcija i broj pritužbi na rad općinskih uposlenika. Krajnji cilj ovog projekta je osim unapređenja efikasnosti i kvaliteta usluga i osavremenjavanja općine uvođenjem novih informacijskih tehnologija, poboljšanje uslova života građana, kroz bolje poslovno okruženje i manje trošenje vremena za dobivanje određenih dozvola i dokumenata.

Za općinu je vrlo važno jačanje demokratskih procesa i poštovanje volje građana. To konkretno znači poštovanje odredbi Izbornog zakona i pravovremeno pripremanje elemenata potrebnih za provođenje izbora. U tom cilju formiran je centar za birački spisak. U skladu sa odredbama Izbornog zakona Bosne i Hercegovine (čl. 3.8.) nadležni općinski organ je odgovoran za organizaciju i efikasan rad Centra za birački spisak.

Kako je vođenje Centralnog biračkog spiska stalan proces to se podrazumijeva da Centar bude operativan tokom cijele godine. Centralni birački spisak je evidencija o državljanima Bosne i Hercegovine koji imaju biračko pravo u skladu sa Izbornim zakonom i formira se, vodi i koristi za potrebe organizacije i provođenja izbora u skladu sa zakonom, za provođenje referendum, za provođenje opoziva izbornog funkcionera i izbore organa lokalne samouprave u skladu sa Izbornim zakonom (čl. 3.1). Centar za birački spisak na planu ažuriranja biračkog spiska je radio kontinuirano tokom cijele godine s ciljem što uspješnijeg i efikasnijeg rada izborne komisije osnovne izborne jedinice za svaku vrstu izbora, a 2007. godine su vršene pripreme za prijevremene izbore za predsjednika RS koji su uspješno provedeni u našoj Općini.

Centralni birački spisak i izvod iz Centralnog biračkog spiska su javni (čl.3.1.stav 2.) i pravo uvida u Centralni birački spisak ostvaruje se u skladu sa Izbornim zakonom, a u toku

2007. godine osim političkih subjekata koji su bili ovjereni za prijevremene izbore za predsjednika RS kojima je bilo omogućeno na njihov zahtjev da dobiju izvod iz Centralnog biračkog spiska u elektronskoj formi ili u ispisu izvršen je uvid u Centralni birački spisak od 3.732 osobe koje je zanimalo da li su ispravno upisani u Centralni birački spisak i pravilno dodijeljeni biračkom mjestu koje bi njima odgovaralo po mjestu prebivališta.

Napomenuli smo da je nadležni Općinski organ odgovoran za uspostavljanje, organizaciju i efikasnost Centra za birački spisak a uz to i za obuku osoblja u Centru što je i činjeno više puta u proteklom periodu. Obuka se izvodila u sjedištu CIPS-a u Sarajevu.

Osim jedinstvenog organa uprave, na nivou općine egzistiraju i javne ustanove čiji je osnivač općina, a koje se finansijski uglavnom naslanjaju na općinski budžet. To se naročito odnosi na Centar za socijalni rad, Bosanski kulturni centar, Televiziju Živinice i Dječije obdanište, dok Dom zdravlja i Veterinarska stanica ne zavise od budžetskih sredstava, a isti je slučaj i sa osnovnim i srednjim školama.

Inicijativa građana i interesno organizovanje u protekloj godini imali su pozitivan trend. Ranije otvoreni žiro-računi u svim mjesnim zajednicama omogućili su lakše provođenje velikog broja projekata u čijoj su realizaciji participirali građani i privredni subjekti. S druge strane, općinske službe za upravu su imale više obaveza. Izvršen popis imovine u svim mjesnim zajednicama naložio je veliki posao vrednovanja i procjene nekretnina i objekata u vlasništvu općine Živinice. Na osnovu nalaza sudskih vještaka Centralna popisna komisija konstatovala je vrijednost imovine općine Živinice preko 31 milion KM.

Nevladine organizacije snažnije i organizovanije su uzele učešće u kreiranju ambijenta naše lokalne zajednice. Naročito bih istakao Centar civilnih inicijativa, Biro za ljudska prava, Bospo i Regionalnu razvojnu agenciju.

III NORMATIVNO-STRUČNI POSLOVI

Težište u normativno stručnim poslovima u protekloj godini bilo je na izradi čitavog seta procedura vezanih za jačanje kontrole utroška budžetskih sredstava i njihove transparentnosti. Osim toga, svi općinski propisi usklađuju se na nivou svake službe sa izmjenama i dopunama zakonske regulative. U kreiranju i pripremi informacija, nacрта i prijedloga akata za Vijeće, osim stručnih lica iz općinskih službi, angažovani su pravници, kako bi pripremljeni materijali bili usklađeni sa svim zakonskim propisima iz određene oblasti. Praksa je pokazala da bez obzira na ovakav način pripreme materijala, često u parlamentarnoj proceduri dođe do donošenja akata koji su praktično neprovođivi, jer nisu usklađeni sa zakonskim propisima.

U protekloj godini zajedno sa šefovima službi sam pripremio, a Općinsko vijeće donijelo čitav niz normativno-pravih akata koji regulišu kako funkcioniranje općinskih službi za upravu, tako i način ubiranja određenih naknada, taksi i drugih prihoda od građana i pravnih lica kojima se puni značajan dio Budžeta općine Živinice.

Pravilnik o plaćama, ranije usklađen sa Zakonom i Kolektivnim ugovorom, primjenjivan je u potpunosti, a zbog objektivnih teškoća u punjenju općinskog budžeta, primjenjivan je najniži 70%-tni koeficijent za osnovicu za plaće.

Kroz vlastiti angažman, koordinaciju i usmjeravanje rada službi općinske uprave, drugih organa i komisija, urađen je najveći dio posla i obaveza u izvršavanju odluka i zaključaka Općinskog vijeća, te priprema materijala i dokumenata za Općinsko vijeće i vijećničke komisije. Saradnja sa Predsjedavajućim i Sekretarom Općinskog vijeća, kao i predsjednicima vijećničkih komisija bila je na potrebnom nivou.

U 2007. godini općinske službe za upravu realizovale su veliki broj poslova i zadataka, a obim i efikasnost u rješavanju zaprimljenih predmeta u upravnom rješavanju dat je u

posebnom izvještaju o upravnom rješavanju u 2007. godini i biće razmatran kao posebna tačka dnevnog reda na sjednici općinskog vijeća Živinice.

IV LJUDSKI RESURSI

Karakteristika zemalja u tranziciji, a među njima i Bosne i Hercegovine je potpuno novi pristup u upravljanju ljudskim resursima, te reforma kompletnog javnog sektora, vojske, policije i pravosuđa.

Kada je u pitanju ova oblast, onda možemo reći da se nalazimo u periodu reforme uprave od koje se očekuje da u potpunosti ispuni obaveze koje društvo pred nju postavlja i da pruži kvalitetnu uslugu svojim građanima. U reformskim procesima koji se odnose na javnu upravu, općina se uključuje u realizaciju strategije reforme javne uprave u Bosni i Hercegovini, čija je izrada sa prvim akcionim planom završena 2006. godine. Predviđeno je da se navedena strategija realizuje u tri faze, a prvim akcionim planom obuhvaćena su prva i druga faza do kraja 2010. godine. Ova reforma treba obezbijediti jačanje upravnih kapaciteta u skladu sa evropskim standardima odnosno profesionalniju, efikasniju, odgovorniju, transparentniju i jeftiniju javnu upravu. Okosnicu takve uprave čine ljudski resursi odnosno ljudi koji u konačnici dobro ili loše obavljaju svoje radne zadatke. Tokom protekle godine smo u fokus stavili upravljanje ljudskim resursima potencirajući da su oni nosioci najvećeg dijela procesa rada, te je na ovom planu nadležna služba vršila intenzivnu analizu potencijala ljudskih resursa na nivou cjelokupnog organa uprave. Rezultati te analize egzaktno pokazuju stanje ovog dijela naših mogućnosti, pa na osnovu dobivenih parametara možemo kreirati akcioni plan upravljanja ljudskim resursima i imati jasnu viziju našeg razvoja u ovom pogledu. Osim toga, a na osnovu pomenutih parametara, možemo reći da smo tek na početku reforme u oblasti ljudskih resursa, što podrazumijeva dalje stručno osposobljavanje osoblja i podizanje nivoa njihove educiranosti i fluktuabilnosti. Ona dalje podrazumijeva i vrlo važnu koordinaciju budžetskog upravljanja, kontrole i potrošnje. Takođe, moderna politika upravljanja ljudskim resursima kojoj težimo, značiće i implementaciju novih softverskih rješenja u upravnom postupanju, unapređenje regrutovanja i odabira kadrova, jasne kriterije za napredovanje, upravljanje učinkom odnosno mjerenje učinka na bazi plana i ostvarenih ciljeva, edukacija i obuka, kvalitetnije primjene disciplinskih kapaciteta kao i unapređenje upravnog odlučivanja, komuniciranja i informatizacije. Osim toga, značajan dio ove reforme ima za cilj i smanjenje administracije, odnosno smanjenje broja zaposlenika i dovođenje na nivo standarda koji se kao zadaci pred nas postavljaju u ovom sveobuhvatnom procesu. U tom smislu naš zajednički zadatak je da kroz program zbrinjavanja viška uposlenika, kvalitetno zbrinemo što više onih koji će ostati bez posla, uglavnom sa srednjom i nižom stručnom spremom. Prije toga treba iscrpiti sve mogućnosti za penzionisanje po osnovu starosne i invalidske penzije, kao i mogućnost rješavanja odlaska radnika u prijevremenu penziju zahvaljujući povoljnim otpremninama i to onih lica koja ispunjavaju zakonske uslove. Napominjem, da u prošloj godini nije vršen prijem državnih službenika, osim 5 pripravnika sa VSS i to preko programa koji finansira Zavod za zapošljavanje TK. Ovim programom je omogućeno mladim obrazovanim kadrovima da obave pripravnički staž i da steknu uslove za samostalno obavljanje poslova i zadataka radnih mjesta za koja su se školovali. Ovim pokazujemo da organ uprave općine Živinice, u granicama svojih mogućnosti, stimuliše zapošljavanje mladih ljudi i njihov ostanak u ovoj zemlji.

Tabela 1. – Struktura stručne sprema zaposlenih u organu uprave

R/b	Stručna sprema	Broj
1	VSS	40
2	VŠS	15
3	SSS	60
4	KV	10
5	OŠ	15
6	NK	2
7	Bez škole	1
8	Svega	143

Tabela 2.- Pregled spolne strukture zaposlenih u organu uprave na dan 31.12.2007. godine

R/b	Naziv službe	Broj uposlenih	Muški	Ženski
1.	Općinsko vijeće	6	2	4
2.	Općinsko pravobranilaštvo	2	1	1
3.	Stručna služba općinskog načelnika	6	3	3
4.	Služba za opću upravu i društvene djelatnosti	37	27	10
5.	Služba za geodetske i imovinsko-pravne poslove	32	19	13
6.	Služba zapoduzetništvo i inspekcijske poslove	15	11	4
7.	Služba za budžet i finansije	8	-	8
8.	Služba za raseljena i izbjegla lica	11	8	3
9.	Služba za stambeno-komunalne poslove	15	7	8
10.	Služba za boračko-invalidsku zaštitu	6	2	4
11.	Općinski štab civilne zaštite	5	3	2
	UKUPNO	143	83	60

Tabela daje prikaz u odnosu zaposlenih muškaraca i žena sa aspekta ravnopravnosti spolova iz kojeg odnosa se vidi da je uposleno 58,04 % muškaraca i 41,96 % žena.

Zaposlenost po nacionalnoj strukturi izražena je u odnosu da na 143 zaposlena 10 je pripadnika **hrvatske nacionalnosti** ili 7 %, **srpske nacionalnosti** 2 zaposlena ili **1,41 %** i ostalo su **Bošnjaci** 131 ili **91,60 %**.

V USLOVI I SREDSTVA ZA RAD

U protekloj godini posebnu pažnju poklonili smo stvaranju boljih uslova za rad zaposlenika i općinskih vijećnika, što smatramo bitnim preduvjetom za uspješan nastavak reforme općinske uprave.

Naime, završena je izgradnja i opremanje Sale za sastanke i Sale za sjednice općinskog vijeća, opremljene sa svom neophodnom opremom i namještajem. U istima su instalirana oprema za audio-video projekciju i klima uređaji.

Izgradili smo baze podataka neophodne za rad organa uprave, a provodimo njihovo kontinuirano ažuriranje čime postižemo spremnost da u svakom trenutku odgovorimo na zahtjeve naših građana. Nastavljeni su radovi na izradi i dogradnji instalacija računarske mreže za sve općinske službe, koje su sada umrežene i povezane u jedan koherentan informatički sistem interne i eksterne razmjene podataka. Općina Živinice raspolaže i u svom radu primjenjuje savremene informatičke programe DocuNova 2.0, FinNova, MatEv, Infodesk i program za vođenje katastra nekretnina, koji omogućavaju brže i efikasnije pružanje usluga građanima.

Rukovodeći se potrebom za stvaranjem boljih i sigurnosnih uvjeta ljudi i materijalnih sredstava, instaliran je i video-nadzor u zgradi br.1 organa uprave, odnosno njenom vanjskom dijelu, te unutarnjem pokrivanju Šalter sale. Osim toga, izgradili smo i vatrodajni sistem u Šalter Sal i budućem prostoru za arhivu u zgradi br.2.

U cilju jačanja radne discipline, uveden je i sistem elektronske registracije prisustva na radnom mjestu zaposlenika organa uprave. Efekti uvođenja tog sistema već su vidljivi. I za kratko vrijeme daju dobre rezultate.

Završeni su svi građevinski radovi na krovovima obje zgrade organa uprave i određeni stepen rekonstrukcije infrastrukture u obje općinske zgrade.

Snabdijevanje općine električnom energijom u protekloj godini bilo je redovno, a njena potrošnja u okviru planirane. Grijanje je besprijekorno funkcionisalo toplinskom energijom iz vlastite kotlovnice. Zbog nestašice pitke vode, ranije kupljeno i na postojeći bunar u opštinskom dvorištu montirano malo pumpno postrojenje, snabdijevalo je obje općinske zgrade vodom 24 sata u kontinuitetu.

Kada su u pitanju materijalni troškovi, istrajali smo na kontinuiranim mjerama štednje u potrošnji papira, kancelarijskog materijala, kopiranja i umnožavanja (koje je isključivo u vlastitoj režiji) i svih drugih sitnih rashoda. Vozni park općine korišten je vrlo racionalno i u okvirima predviđene potrošnje. Jedno rashodovano putničko vozilo marke Mercedes prodato je u postupku javnog nadmetanja.

Dugo prisutan problem odlaganja i čuvanja općinske arhive kvalitetno je riješen, korištenjem prostorije koju smo dobili iseljenjem Odjeljenja ministarstva odbrane, a u saradnji sa Arhivom TK, dio dokumentacije, izlučujemo i predajemo na trajno čuvanje Kantonalnom Arhivu. Kancelarijski namještaj, kase, ormari, te namjenska oprema za Geodetsku službu je u dosta lošem stanju. U toku protekle godine bilo je manjih interventnih nabavki osnovnog kancelarijskog namještaja, ali i dalje svakako postoji potreba za značajnijim nabavkama istog. Procjenjujući prioritete i potrebe organa uprave u cjelini zaključili smo da u odnosu na kancelarijski namještaj imamo puno važnijih potreba, pa je nabavka istog odložena za budući period.


VI BUDŽET

Budžet općine Živinice za 2007. godinu, kada su u pitanju prihodi, rebalansom je planiran u iznosu od 15 615 674,00 KM., a ostvaren je sa 79 %, uz indeks 0,79. Moramo naglasiti da su u strukturi ukupnih prihoda, prihodi od poreza imali ostvarenje od 90 %,

neporezni prihodi od 72 % i tekuće potpore (grantovi) 57 %. Manje ostvarenje tekućih potpora prouzrokovalo je niži stepen ostvarenja gore pomneutog procentualnog ostvarenja ukupnih prihoda budžeta. Općina Živinice nije u toku 2007. godine ostvarila planirani grant od 800 000 KM koji se odnosi na stambeno zbrinjavanje korisnika BIZ-a, već tek u januaru 2008. godine, a što se ima zahvaliti neažurnosti viših nivoa vlasti koji su bili dužni izvršiti svoje obaveze prema općinama po ovom osnovu na vrijeme.

Važno je napomenuti da je otplata deficita – duga općine u prošloj godini iznosila je 1 764 527,00 KM, što procentualno iznosi 94% i pokazuje nastavak odgovorne i domaćinske politike općinskih vlasti prema svojim povjeriocima. Inače, deficit budžeta općine za 2007. godinu je umanjen u odnosu na prošlu godinu i on zaključno sa 31.12.2007. godine iznosi 3 926 403,00 KM.

Analizirajući trend budžetskih prihoda sa tabele priloga može se zaključiti da su u 2007.godini oni bili najlošiji u periodu januar-mart. Pozitivan trend prihoda bilježimo u mjesecima maj, juli, avgust, septembar, oktobar i decembar. Međutim, ovaj pokazatelj govori o praksi kantonalnog budžeta da čitavu godinu zadržava novac namijenjen općinama, “radi” s njim i preusmjerava ga kreirajući svoju budžetsku politiku, naravno sve na račun i štetu općine. Takozvano peglanje izvrši se na samom kraju godine kada općina nema nikakvu mogućnost kreiranja prioriternih ulaganja u razvojne projekte.



Grafički prikaz ostvarenja prihoda budžeta Općine Živinice za 2007.godinu

VII PROSTORNO PLANIRANJE, URBANIZAM I STAMBENO-KOMUNALNA PROBLEMATIKA

U 2007. godini shodno Prostornom planu TK općinsko vijeće Živinice je na prijedlog općinskog Načelnika donijelo odluku o pristupanju izradi Prostornog plana općine Živinice, a za šta su bila predviđena sredstva općinskim budžetom. S obzirom da je centralna gradska zona pod intenzivnom gradnjom donešena je odluka o izradi urbanističkog projekta centralne gradske zone sa posebnim akcentom na rješavanje završetka izgradnje gradskog bulevara i parking prostora iza zgrade općine. S obzirom da se prigradske mjesene zajednice takođe naglo šire donesena je odluka o izradi urbanističkog plana grada Živinic sa ciljem zaustavljanja divlje gradnje na ovim prostorima.

Jedna od vrlo važnih odluka donesenih u 2007. godini jeste odluka o izmjenama i dopunama Regulacionog plana Novi grad-Centralna zona, a čiji je cilj dalje širenje grada na ovom potezu.

Kroz općinu Živinice prolazi i magistralni put M-18, a priključci na ovaj put predstavljaju problem kako fizičkim licima tako i privrednim subjektima. Zbog toga je donešena odluka o izradi urbanističkog plana priključaka na ovaj put, koja bi riješila navedene probleme, a postigao bi se veći stepen sigurnosti učesnika u saobraćaju.

U 2007. godini započeta je i izgradnja raskrsnice za Ciljuge na kojoj je predviđena i semaforizacija, na koji način će se riješiti ovo usko grlo u saobraćaju. U saradnji sa Direkcijom cesta FBiH urađena je projektna dokumentacija za rješavanje pitanja izlaza iz grada kod benziske pumpe "Kalesić".

U protekloj godini započeta je izgradnja dva stambena bloka koji će u narednoj godini biti i useljeni. U toku je i rješavanje imovinsko-pravnih odnosa za izgradnju jednog velikog stambenog bloka, tzv. Blok-4.

U 2007. godini urađen je i poligon za male sportove sa vještačkom travom koji je dat na upravljanje gradskoj dvorani Živinice, a u sklopu tog projekta urađena je i fontana u parku kod hotela "Konjuh". Nastavljeno je kontinuirano uređivanje pješačke zone u ul. Alije Izetbegovića, kao i i pješačke zone kod Islamskog centra. U II ulici, u cilju poboljšanja sigurnosti u saobraćaju, urađeno je i novo autobusko stajalište.

U protekloj godini općinsko vijeće je usvojilo Pravilnik o dodjeli stanova i u toku je konkurs za dodjelu istih. Stambeni odsjek u nadležnoj službi posebnu pažnju pridaje održavanju zajedničkih prostorija u zgradama, pa su nakon provedenog konkursa privatni poduzetnici dobili certifikate za održavanje istih.

Komunalna problematika je bila i ostala ključna oblast za općinu, kao osnovnu jedinicu lokalne uprave. U prošloj godini, ustaljena sistemska rješenja dobro su funkcionisala. Osim teškoća u snabdijevanju grada pitkom vodom, čiji su uzrok velika dugovanja za potrošnju vode i dotrajala gradska vodovodna mreža, možemo konstatovati da su druge oblasti zajedničkih komunalnih potreba bile kvalitetno pokrивene. Održavanje puteva, gradskih ulica i drugih javnih površina bilo je kvalitetno i u ljetnom i u zimskom periodu. Postavljanjem zatvorenih kontejnera pored stambenih zgrada, kao i velikog broja malih korpi za smeće duž pješačke zone i u gradskim parkovima higijena grada podignuta je na veći nivo.

Na području čitave teritorije općine Živinice nastavljeno je organizovano uklanjanje svih divljih deponija i čišćenje svih zelenih površina, riječnih korita i vodotoka u sklopu akcije "Manje smeća – više cvijeća". Poseban efekat ostvaren je uklanjanjem olupina automobila i drugog metalnog otpada na čitavom području, te nastavkom javnih radova na uređenju putnih pojasa.

VIII BORAČKA POPULACIJA U KONCEPTU LOKALNE SAMOUPRAVE

Nastavljena je primjena Zakon o osnovnim pravima boraca usvojenog na nivou Federacije, a mi smo na općinskom nivou ustrojili i kompletnu regulativu iz kantonalnog Zakona o dopunskim pravima boraca. Tako su donešena sva akta u nadležnosti Općinskog načelnika, kojima se regulišu olakšice i oslobađanja od plaćanja općinskih taksi i drugih vrsta naknada. Donešen je i Pravilnik o kriterijima za aplikaciju i dodjelu jednokratnih novčanih pomoći na nivou Službe za boračko-invalidsku zaštitu, kao i subvencioniranje troškova sahrane za lica i kategorije iz pomenutog Zakona. U novoj Odluci o komunalnoj naknadi – renti, Vijeću je predloženo oslobađanje boračkih kategorija od 50%.

U prošloj godini, nastavljena je kontinuirana materijalna i finansijska podrška kategoriji lica iz boračke populacije gdje je putem općinskog Budžeta realizovano oko 120.000,00 KM, za JNP po Odlukama Ministarstva finansija. Za redovan rad boračkih organizacija dato je oko 40.000,00 KM, a stambeno zbrinjavanje korisnika BIZ-a, iako su procedure izbora korisnika na vrijeme okončane, nisu doznačena u protekloj godini na račun budžeta općine. Dodaju li se tome i sredstva koja su prema ovoj populaciji usmjerena za izgradnju spomen-obilježja u iznosu od oko 40.000,00 KM kao i troškove dženaza u iznosu od oko 18.000,00 KM, možemo konstatovati da je ovoj ciljnoj grupi prioritarno izdvojeno 220.000,00 KM, što predstavlja zaista značajnu sumu.

Pored toga, općina se aktivno uključila u stambeno zbrinjavanje pripadnika boračke populacije koji nemaju riješeno stambeno pitanje, tako da smo u predhodnoj godini više puta intervenisali i smještali privremeno ova lica u slobodne stambene prostore kojima raspolaže općina.

IX POVRATAK

Nakon posljednjeg popisa raseljenih lica iz 2005. godine broj istih je u konstantnom opadanju. Trenutno na evidenciji imamo 1047 porodica odnosno 2967 raseljenih lica. Po evidencijama koje vodimo 26 porodica je dobilo donaciju za obnovu svojih kuća u prijeratnom mjestu prebivališta i isti su se vratili tokom 2007. godine. Status raseljenih osoba izgubile su 22 porodice po osnovu nastanjenja u mjestu trenutnog boravišta.

Želimo da napomenemo projekat koji se vodi na nivou države putem Ministarstva za ljudska prava i izbjeglice-projekat CEB-a koji se realizira uz pomoć Razvojne banke Vijeća Evrope, nadležnih ministarstava, UNHCR-a i općina koji ima za cilj obnovu i sanaciju stambenog fonda u prijeratnom mjestu prebivališta korisnika kolektivnih centara i naselja. Ovaj projekat je u prvoj i drugoj fazi realizacije čime će biti obuhvaćeno 44 porodice iz naselja Višća i Karaula.

Pored raseljenih lica/prognanika na području općine Živinice u protekloj godini bile su smještene 23 izbjeglice sa Kosova kojima je Ministarstvo sigurnosti BiH dalo prihvata do kraja septembra 2007. godine, isto ministarstvo nije produžilo saglasnost tako da više na evidenciji nemamo izbjeglice sa Kosova. Isti su bili smješteni kod rodbine, prijatelja i rješavanje njihovog statusa bilo je u nadležnosti Ministarstva sigurnosti BiH.

Od 1047 porodica koje trenutno borave na području općine Živinice 212 porodica je smješteno na području općine Živinice, u naseljima Višće i Karaule, u kućama "Holandske Vlade" je smješteno 66 porodica, 13 porodica smješteno je u škola-dom Suha, Dom-Podgajevi, a ostali su smješteni na drugi način (kod rodbine ili prijatelja).

Bez obzira što općina Živinice nema neku konkretnu nadležnost nad ovom populacijom, vrlo često većina brige o rješavanju njihovih problema i potreba padne na općinu. Mi te probleme pokušavamo riješiti, ako je moguće samostalno, a ako ne, onda obraćanjem nadležnom ministarstvu.

Ne možemo da ne konstatujemo da je materijalni položaj izbjeglih i raseljenih lica težak i da po procjenama oko polovine porodica nema nikakvih primanja.

X ZAPOSŁJAVANJE I SOCIJALNA POLITIKA

Zapošljavanje je definitivno generator razvoja lokalne zajednice, a time i društva u cjelini. Protekla godina rezultirala je pozitivnim trendom i značajnim pomacima u ovoj oblasti, naročito kroz formu tzv. samozapošljavanja i sezonskog i vezanog zapošljavanja. Iako broj nezaposlenih na Birou svake godine poraste za generaciju srednjoškolaca i studenata, općina Živinice uspijeva održati balans na drugoj strani poluge ovog značajnog pokazatelja, odnosno novim radnim mjestima. Brojčano izraženo, to izgleda ovako:

Broj nezaposlenih u 2007. godini bio je 12.709 lica, što je u odnosu na 2006. godinu povećanje nezaposlenih lica na području naše općine.

Sto se tiče strukture privrede, po broju registrovanih 312 firmi (prema podacima Agencije za finansijske i informativne poslove, a prema broju završnih računa za 2006. godinu) trgovina čini 154 ili 49,4% u odnosu na proizvodnju koju čine 105 ili 33,6%, te usluge 53 ili 17%. Po prihodima, trgovina uzima 58,1% u odnosu na pomenute oblasti, a po broju radnika 1209, a proizvodnja uzima 36,9 % ili 3 383 zaposlenika, dok usluge čine 5% ili 490 zaposlenih. Ono što ohrabruje je činjenica da većina privrednih društava bilježi pozitivno poslovanje, što je slučaj nakon dugo godina i sa jednim od nosilaca živiničke privrede - drvnom industrijom "Konjuh" koja je i u 2006., ali i u 2007. godini zabilježila dobit. Iz raspoloživih statističkih podataka vidi se da 49 % subjekata bavi trgovinom, a ostvaruju preko 58% bruto prihoda. Bruto prihodi privrednih društava, po posljednjim podacima koje imamo (31.12.2006. godine) iznose preko 387 miliona KM, neto dobit iznosi 7,085 miliona KM, dok gubitak iznosi 4,9 miliona KM. poređenjem prihoda i rashoda u ovom periodu može se zaključiti da je ukupno poslovanje privrede pozitivno jer je iskazana dobit veća od gubitka za cca 3 miliona KM. Podaci za 2007. godinu tek su u fazi obrade i analize, jer se izvještaji pripremaju i zaključuju tek po okončanju februara mjeseca 2008. godine. Navedeni podaci koji se odnose na bruto prihod veći su za 8,4 % u odnosu na predhodni izvještajni period. Takođe, u navedenom periodu došlo je do porasta broja zaposlenih lica što je praćeno i sa rastom prosječne neto plate za 5 % i ista je iznosila oko 460 KM mjesečno.

Na području općine Živinice imamo ukupno registrovano i 426 samostalnih djelatnika, od čega je 400 kao osnovno i 26 kao dopunsko zanimanje. U strukturi 37,09% čini trgovina na malo, 12,68% ugostiteljstvo, 26,76% zanatstvo, 0,94% poljoprivreda, 11,27% autoprevoznici i taksisti, a 7,98% intelektualne usluge. Zanatstvo iskazuje negativan trend, što je slučaj u čitavoj Bosni i Hercegovini. Iako naizgled skromna, samostalna djelatnost bilježi značajne finansijske efekte.

Za nas je vrlo značajno da u svojoj viziji razvoja, sa posebnim interesovanjem, definiramo poljoprivredu kao strateški pravac. U protekloj godini posvetili smo značajnu pažnju razvoju individualnog poljoprivrednog proizvođača, poduzetništvu u poljoprivredi i iskorištenosti poljoprivrednog zemljišta. U toj oblasti imamo dobrih rezultata. Jedna od poteškoća koja se javila je i slabija organiziranost naših poljoprivrednih proizvođača i nepostojanje pravnog subjekta koji bi objedinio njihove interese i pomogao u projiciranju razvoja na tom polju. Ovo smatramo jako važnim posebno zbog toga što je Sprećka dolina vrlo zanimljiva velikim industrijskim proizvođačima koji bi željeli da zakupom većih površina zemljišta na duži period uspostave monopol nad poljoprivrednom proizvodnjom i tržištem poljoprivrednih proizvoda. Već smo sa kantonalnom vladom imali određene razgovore i sastanke povodom uvođenja takvih subjekata na ovaj proctor, prilikom čega smo

izrazili naš negativni stav i zabrinutost za naše poljoprivredne proizvođače, a samim time bio bi ugrožen razvoj naše lokalne zajednice na tom strateškom pravcu.

Iako ukupan broj zaposlenih kroz razne forme donosi blagi optimizam, i dalje zabrinjava status stvarno nezaposlenih lica, koja su bukvalno na ivici životne egzistencije. Posebnu kriznu grupu čine demobilisani borci i lica koja zaposlenje traže više od 10 godina, jer oni uskoro neće biti u poziciji da steknu penziju i kada bi se zaposlili. Stoga, naš Centar za socijalni rad, osim zbrinjavanja preko 1.500 korisnika socijalne pomoći i tuđe njege, mora da zbrinjava makar jednokratno, i kategorije nezaposlenih sa dna egzistencijalne piramide.

XI PROCES PRIVATIZACIJE

Proces privatizacije nije u općinskoj nadležnosti. Bez obzira na tu činjenicu, kao lokalna zajednica ne možemo, a da se ne osvrnemo i na taj segment društvenog života. Naime, problemi koji se na tom polju pojavljuju dodatno opterećuju lokalnu zajednicu kao najniži nivo institucionalnog organizovanja gdje radnici i građani stalno čekaju da dobiju potrebnu pomoć i podršku. Kada se rješavaju pitanja vezana za privatizaciju pojedinih pravnih subjekata, obično nas zaobiću za davanje naših mišljenja ili eventualnih prijedloga prevazilaženja problema, ali nas redovno kontaktiraju kada treba rješavati posljedice nastale kao rezultat pogrešnih politika.

Privatizacija, bez obzira koliko hvaljena od strane njenih protagonista, u suštini, predstavlja koncentraciju kapitala i moći iz ruku nekadašnjih "samoupravljača" u ruke malog broja bogataša. Ovo nije nostalgija za nekim prošlim vremenima, već briga za realno raslojavanje društva na sve manji broj bogatih i sve veći broj siromašnih građana, jer srednjeg sloja kome većina od nas realno pripada lagano potpuno nestaje.

XII INVESTICIJE, PROJEKTI INFRASTRUKTURE I RAZVOJ

Investiciona ulaganja na području općine Živinice u prošloj godini bazirana su na sredstvima općinskog Budžeta i Fonda za nacionalizovano zemljište, sredstvima kantonalnih i federalnih institucija od kojih smo dobivali neznatan dio sredstava prikupljenih kroz javne prihode sa područja općine Živinice, sredstvima međunarodnih vladinih i nevladinih organizacija, ali i minimumom sredstava prikupljenih na nivou mjesnih zajednica i interesnih zborova od naših građana.

Sve mjesne zajednice sa područja općine Živinice imale su priliku da se uključe u realizaciju navedenih projekata, jer su procedure provedene javno i transparentno putem postupka javnih oglašavanja. Veći dio mjesnih zajednica uključio se u navedene aktivnosti, a smatramo da smo svi zajedno postigli odlične rezultate na ovom polju.

Svakako, težište ukupnog razvoja u općini bilo je na projektima i investicijama infrastrukture. Kontinuirano se radilo na asfaltiranju puteva i ulica. Naš koncept, da u pomanjkanju finansijskih sredstava u budžetu općine, u partnerstvu sa građanima po već oprobanom principu zajedničkog ulaganja, nadomjestimo nedostajući dio finansijskih sredstava pokazao se ispravnim i djelotvornim. Zahvaljujući zajedničkim naporima u protekloj godini, izgradili smo 29,743 km novih asfaltnih puteva, a u ovoj godini završićemo 11,669 km puta, za što su ugovori o izvođenju radova već potpisani i obezbijedena novčana sredstva. Cjelokupan program nismo uspjeli završiti zbog produžavanja rokova za aplikaciju i obezbjeđenja potrebnih naknadnih odobrenja od strane općinskog vijeća. Vrijednost predmetnih radova realiziranih u 2007. godini iznosila je preko 2.000 000,00 KM.

Izgrađeno je 21 km javne rasvjete, čime smo uticali na stvaranje povoljnije klime opće sigurnosti za građane, sa ulaganjem od oko 550 000 KM.

Nastavili smo pružati podršku izgradnji sportskih poligona u sastavu osnovnih škola, tako da su u protekloj godini izgrađena 3 poligona u MZ-a Podgajevi, G. Živinice i Barice, a započeti su radovi na izgradnji istog u Šerićima. Ukupna ulaganja na već dovršene projekte poligona iznose oko 100 000 KM, a ostaje završavanje poligona u Šerićima sa ulaganjem oko 26 000 KM.

Obezbjeđivanje potrebnih količina pitke vode naša je stalna obaveza, pa smo u toku prošlogodišnjeg perioda izvršili ulaganja u poboljšanje vodosnadbijevanja mjesnih zajednica G.Živinice, Šišići i Šahići u iznosu od oko 350 000 KM. Pored toga, započeti su radovi na rekonstrukciji vodovoda Sinac-rijeka (MZ Đurđevik Stari-Kovači-Đurđevik Dom), ali i izgradnji vodovoda Kopjevići (MZ Gornje Živinice).

Rješavanje izgradnje kanalizacione mreže postaje značajan problem na području cijele općine. Usmjerenost na rješavanju ovog pitanja naše je prioritetni zadatak. U tom smislu stupili smo u kontakt sa nadležnim kantonalnim i federalnim ministarstvima i relevantnim međunarodnim finansijskim institucijama, kako bi zajednički obezbijedili novčana sredstva za rješavanje navedenog pitanja. To je rezultiralo konkretnom finansijskom podrškom koja će biti implementirana u narednom periodu. Konkretno, preduzeli smo mjere na izgradnji 1 km kanalizacijske mreže u prigradskom području i pripremili se za izgradnju još 1000 m iste.

U izgradnju manjih mostova za potrebe naseljenih mjesta na području naše općine uloženo je oko 25 000 KM. pripremljena je i projektna dokumentacija za most na lokalnom putu Gračanica-Tupković, na Gračaničkoj rijeci. Most na rijeci Oskovi, na regionalnom putu bio je u planu Direkcije za ceste TK, ali do realizacije tog projekta nije došlo zbog nama nejasnih razloga.

U urbanom dijelu grada, nastavljene su aktivnosti na izradi pješačkih staza i do sada je urađeno 3154 m² sa ulaganjem od 247 000 KM; u dijelu I ulice, od marketa Bingo do Markanove stanice uređeno je autobusko stajalište sa pješačkom stazom u dužini od 120 m, a što novčano iznosi 41 000 KM.; rekonstrukcija dijela ul. Oslobođenja od raskršća sa II ulicom, prema islamskom centru, obavljena je u dužini od 130 m, što novčano iznosi oko 31 000 KM; rekonstrukcija ulice prema SPC "Oko" sa izradom kanalizacije u dužini od 60 m, što novčano iznosi oko 20 000 KM; izgradnja igrališta za male sportove "Hattrick" iznosila je novčanu vrijednost od 25 000 KM; nastavak izgradnje fontane u gradskom parku iznosio je 15 000 KM; izrada horizontalne i vertikalne signalizacije iznosila je novčanu vrijednost od oko 16 000 KM; rekonstrukcija sa asfaltiranjem prilaza zgradama kolektivnog stanovanja iznosila je novčanu vrijednost od oko 48 000 KM; ostale sitne intervencije na gradskim ulicama iznosile su oko 25 000 KM. Ovim poslovima, ulaganje u gradsku urbanu zonu ukupno iznosi oko 460 000 KM. Takođe smo nabavkom profesionalnih koševa, koji ispunjavaju standarde međunarodnih košarkaških asocijacija, omogućili odigravanje košarkaških utakmica i razvoj košarke kao sporta u našem gradu.

U protekloj godini izgradnjom niskonaponske mreže riješili smo pitanje napajanja električnom energijom naselja Novi Grad-Živinice.

Nastavljen je i projekat Uređenja korita rijeke Spreče nizvodno od mosta na magistralnom putu M-18 u Malinama do ušća u jezero Modrac, ali je još uvijek ostalo neriješeno pitanje spajanja novoizgrađenog korita rijeke Spreče uzvodno od mosta na mag. putu M-18. Nastavićemo napore da se i ovo pitanje riješi u narednom periodu, jer time stvaramo uslove za normalan rad poduzetničkih kapaciteta u industrijskoj zoni Maline i preventivno djelujemo na zaštitu od poplava.

Stanogradnja u samom gradu i zoni obuhvata regulacionih planova nastavlja trend iz predhodnog perioda.

I ove godine, kao i prošlih, obezbijedena su novčana sredstva za izvođenje javnih radova. Posebno značajno smatramo istaknuti da smo na pomenutom projektu angažovali veliki broj lica sa evidencije Zavoda za zapošljavanje. Time smo obezbijedili korist široj društvenoj zajednici i istovremeno pomogli nezaposlenim licima.

Nastavljena je realizacija projekta rekultivacije degradiranog zemljišta (zapadnog odlagališta bivšeg PK Bašigovci) za šta su obezbijedena značajna finansijska sredstva.

Nastavljen je projekat širenja mreže kablovske televizije na šire područje općine Živinice.

XIII OBRAZOVANJE

Predškolsko obrazovanje se odvija u okviru JU „Dječije obdanište“ Živinice. Ovim oblikom obrazovanja u školskoj 2006/2007 godini obuhvaćeno je 85 djece predškolskog uzrasta. U školskoj 2006/2007 godini rad JU „Dječije obdanište“ odvijao se u teškim materijalno finansijskim uslovima jer jedino ovaj nivo obrazovanja nije u sistemu finansiranja iz Kantonalnog budžeta. Objekat obdaništa je u lošem fizičkom stanju, oprema i učila su zastarjeli a finansijska sredstva koja osnivač – općina Živinice izdvaja u okviru svojih mogućnosti nisu dovoljna za rad ove ustanove u skladu sa pedagoškim standardima i normama. U 2007. godini JU Dječije obdanište doznačena su sredstva u iznosu od 71.200,00 KM kako je bilo planirano budžetom. I pored navedenih problema ciljevi i zadaci predviđeni programom rada su realizovani. Općinsko vijeće i općinski načelnik upoznati su sa stanjem u ovoj ustanovi kroz izvještaj o radu i program rada za narednu godinu.

Dječije obdanište zapošljava 13 uposlenika od čega 6 odgajateljica, 3 njegovateljice, 1 bibliotekar, 2 spremačice i 1 rukovodno osoblje.


Osnovnim obrazovanjem učenika bavi se 9 (devet) osnovnih škola koje je u školskoj 2006/2007 godini pohađalo 7.361 učenika raspoređenih u 296 odjeljenja. Upoređujući podatke u ovoj školskoj godini sa prošlom može se konstatovati da je broj učenika smanjen za 274. U školsku 2007/2008 godinu u prve razrede osnovnih škola upisano je 688 učenika što je u odnosu na prošlu školsku godinu povećanje za 10 učenika.




U tabeli broj 1. koja slijedi dat je pregled broja učenika i odjeljenja po školama kao i uspjeh na kraju školske godine:

Tabela-1. Broj učenika i odjeljenja po školama

Naziv škole i sjedište	Broj učenika	Br.od j.	Prola zi	%	Pad a	%	Neo cj.	%	Sre.oc j.
<i>JU I O.Š. Živinice</i>	1031	38	819	100	-	-	-	-	4,40
<i>JU II O.Š. Živinice</i>	1254	45	1065	99,41	4	0,29	2	0,20	3,94
<i>JU O.Š. «Dubrave»</i>	699	29	594	100	-	-	-	-	4,41
<i>JU O.Š.»Šerići«</i>	828	35	700	100	-	-	-	-	4,35
<i>JU O.Š.»Gračanica»</i>	967	40	823	100	-	-	-	-	3,89
<i>JU O.Š.»Bašigovci«</i>	532	23	383	100	-	-	-	-	4,19
<i>JU O.Š.»Đurđevik«</i>	1081	43	872	99,77	2	0,23	-	-	4,16
<i>JU O.Š.»G.Živinice»</i>	335	17	265	98,78	3	1,22	-	-	4,12
<i>JU O.Š.»Višća «</i>	634	26	512	99,80	1	0,20	-	-	4,01
UKUPNO :	7361	296	6033	99,80	10	0,17	2	0,03	4,16

Napomena : prikazanim podacima koji se odnose na uspjeh nisu obuhvaćeni učenici I i II razreda devetogodišnje osnovne škole jer se oni opisno ocjenjuju.







Srednjim obrazovanjem u okviru Mješovite srednje škole i Gimnazije obuhvaćeno je 1.705 učenika raspoređenih u 16 odjeljenja gimnazije i 40 odjeljenja Mješovite srednje škole. U Mješovitoj srednjoj školi obrazuju se učenici za zanimanja mašinske, elektro, drvoprerađivačke i poljoprivredne struke.



Upis učenika u prvi razred Gimnazije, Tehničkih škola i Stručnih škola-zanimanja za školsku 2007/2008 godinu izvršen je tako što je u Mješovitom srednjoj školu upisano 325 učenika raspoređenih u 11 odjeljenja i 135 učenika u Gimnaziju raspoređenih u 4 odjeljenja.

U tabelama broj 2. i 3. dat je pregled broja učenika i odjeljenja kao i pregled uspjeha na kraju školske 2006/2007 godine.

Tabela-2.-Zbirni pregled broja učenika, odjeljenja i uspjeha u MSŠ

Razred	Br.odj.	Br.uče.	Prolazi	%	Pada	%	Neocj.	%	Sr. ocj.
<i>I</i>	12	400	388	97,0	12	3,0	-	-	3,5
<i>II</i>	10	326	321	98,5	5	1,5	-	-	3,5
<i>III</i>	13	364	353	97,0	11	3,0	-	-	3,4
<i>IV</i>	5	138	136	98,6	2	1,4	-	-	3,5
SVEGA	40	1228	1198	97,6	30	2,4	-	-	3,5













Tabela-3.- Pregled broja učenika, odjeljenja i uspjeha u gimnaziji

Razred	Br.odj.	Br.uče.	Prolazi	%	Pada	%	Neocj.	%	Sr. ocj.
<i>I</i>	4	112	109	97,3	3	2,7	-	-	3,95
<i>II</i>	4	133	132	99,2	1	0,8	-	-	4,00
<i>III</i>	4	131	130	99,2	1	0,8	-	-	4,07
<i>IV</i>	4	101	101	100	-	-	-	-	4,18
SVEGA	16	477	472	99,0	5	1,0	-	-	4,10







U odnosu na period od prije nekoliko godina položaj osnovnih i srednjih škola sada je znatno povoljniji kad je riječ o finansiranju materijalnih troškova i plaća zaposlenih što je nadležnost kantonalnog ministarstva obrazovanja. Na ovaj način stvoreni su povoljniji uslovi za odvijanje odgojno-obrazovnog procesa. Menadžment škola i zaposleni sada su usmjereni na iznalaženje mogućnosti za unapređenje stanja u ovoj oblasti kroz stvaranje boljih uslova u pogledu prostora i opreme za odvijanje nastave. U ovom smislu općina Živinice se uključila u okviru svojih mogućnosti u realizaciju pokrenutih projekata kao što su izgradnja dodatnog školskog prostora, izgradnja sportskih poligona, nabavka neophodnih nastavnih sredstava i opreme, saniranje dotrajalih krovova, dimnjaka kao i rješavanje problema kanalizacione mreže i centralnog grijanja. Za navedene aktivnosti općina Živinice izdvojila je sredstva u iznosu od 142.000,00 KM. Osim učešća u ovim aktivnostima, općina Živinice je podržavala učenike naših škola u takmičenjima iz raznih oblasti znanja, sporta, kulture i umjetnosti. Za učenike koji su postigli značajne rezultate i uspjehe na ovim takmičenjima organizovani su prijemi kod općinskog Načelnika prilikom kojih su im uručene odgovarajuće pohvale i nagrade.

Najizraženiji problemi ispoljeni su u II Osnovnoj školi zbog nedostatka učioničkog prostora kao i u školi Gornje Živinice koja nema fiskulturnu salu. Pošto su i gimnazija i MSS smještene u istoj zgradi i tu se osjeća nedostatak prostora za normalno odvijanje odgojno-obrazovnog procesa. U toku su aktivnosti za prevazilaženje ovog problema kroz dogradnju postojećeg školskog objekta za potrebe Gimnazije. Sadržaji predviđeni nastavnim planovima i programima su realizovani u cjelini. Općinsko vijeće i općinski načelnik su o stanju u školstvu od strane službe upoznati kroz informacije: o planu upisa u I razrede srednjih škola na području Tuzlanskog kantona, o izvršenom upisu u I razrede osnovnih i srednjih škola i informaciju o uspjehu učenika na kraju školske 2006/2007. godine u osnovnim i srednjim školama naše općine.

XIV KULTURA I INFORMISANJE

U **oblasti kulture** koja obuhvata sve oblike stvaralaštva, prenošenja i očuvanja kulturnih vrijednosti općina je većinu svojih aktivnosti usmjerila na stvaranje mogućnosti za razvoj kulturnih djelatnosti i obezbjeđenje uslova za stvaranje, prenošenje i dostupnost kulturnih vrijednosti građanima općine Živinice. U tom smislu u budžetu su obezbijedena sredstva za rad ustanova i institucija kulture kao što su JU BKC, KUD, UG „Scena“ - Gradsko pozorište, BZK „Preporod“, HKD „Napredak“ i sredstva za kulturne programe i projekte od

interesa za općinu. Uspostavljena je neposredna saradnja sa ustanovama i institucijama kulture u realizaciji utvrđenih i usvojenih projekata i programa a vršen je i nadzor nad njihovom realizacijom.

U 2007. godini na području općine Živinice odvijale su se raznovrsne kulturne aktivnosti od kojih ćemo istaći najznačajnije.

Povodom obilježavanja značajnih datuma organizovane su svečane akademije. Kao i prethodnih godina realizovana je kulturna manifestacija "Smotra kulturno-umjetničkog stvaralaštva" učenika osnovnih škola na kojoj je uz učešće oko 1.000 učenika i nastavnika prezentovano stvaralaštvo iz oblasti drame, recitovanja, muzike, folklora i likovne umjetnosti. Manifestacija se održavala dva dana 17. i 18. aprila u velikoj sali BKC-a. Općina je u saradnji sa školama-aktivima direktora vodila cjelokupni proces realizacije ove manifestacije.

U 2007. godini Živinice su bile domaćin prve međunarodne smotre folklornog stvaralaštva koja je održana na Gradskom bulevaru od 14. do 17. juna. Učesnici smotre bila su kulturno umjetnička društva iz Hrvatske, Slovenije, Makedonije, Poljske i Bosne i Hercegovine. Općina je u saradnji sa KUD-om Živinice učinila sve da ova manifestacija koja je imala 350 učesnika i oko 5.000 gledalaca protekne bez problema u organizacionom i svakom drugom pogledu.

Po sedmi put za redom, u periodu od 19. juna do 10. septembra 2007. godine održana je kulturna manifestacija „Živiničko ljeto“ na Gradskom bulevaru. Općina je u vezi nesmetanog odvijanja ove manifestacije izvršila sve neophodne pripreme od izrade Programa manifestacije, njegovog upućivanja Općinskom vijeću na usvajanje do provođenja procedure javne nabavke i odabira najpovoljnijeg ponuđača za realizaciju tog programa. U toku održavanja manifestacije građanima općine Živinice ponuđen je raznovrstan kulturno-umjetnički program od koncerata narodne i zabavne muzike, pozorišnih predstava, humorističkih večeri do nastupa izvođača izvorne narodne muzike. Osim nastupa afirmisanih estradnih umjetnika općina je kroz odabir izvođača pružila priliku mladim talentima iz različitih žanrova stvaralaštva za javnu afirmaciju i upoznavanje šireg kruga publike sa njihovim radom u oblasti kulture. Od ove godine u cilju omogućavanja šireg pristupa sadržajima kulture dio programa manifestacije smo realizovali i na prostorima naših seoskih mjesnih zajednica.

U **oblasti informisanja** građana i dalje je jedino glasilo JU RTV Živinice koja profesionalno obavlja svoju zadaću pravovremenog i objektivnog informisanja građana u svim značajnim dešavanjima na području općine Živinice i šire.

O stanju u oblasti kulture i informisanja općinsko vijeće i općinski Načelnik upoznati su kroz: izvještaje o radu JU BKC i JU RTV, programe rada ovih ustanova kao i kroz informaciju o stanju u oblasti kulture koju je Služba pripremila za razmatranje na općinskom vijeću.

Ocjenjujući stanje u oblasti kulture i informisanja iz pozicije zakonom definisanih nadležnosti općine možemo konstatovati da je općina Živinice ispunila sve finansijske obaveze prema ustanovama i institucijama iz ovih oblasti utvrđene budžetom za 2007. godinu, kao i obaveze neposrednog finansiranja usvojenih projekata i programa iz oblasti kulture. Za finansiranje djelatnosti JU BKC, JU RTV, Gradskog pozorišta, KUD-a, BZK Preporod i HKD Napredak izdvojena su sredstva u iznosu od 266.000,00 KM, a za neposredno finansiranje kulturnih projekata (Smotra stvaralaštva učenika osnovnih škola, Likovna kolonija, Živiničko ljeto, Međunarodna smotra folklora) izdvojeno je 49.600,00 KM. Na ovaj način omogućeno je ustanovama i institucijama kulture i informisanja da realizuju svoje programe i projekte.

XV SPORT

U oblasti sporta općina je svoju aktivnost usmjerila na stvaranje uslova za zadovoljavanje lokalnih potreba građana u sportu i sportskoj rekreaciji. Sportska djelatnost na području naše općine odvija se kroz rad sportskih klubova i kroz aktivnosti sportskog saveza općine Živinice.

U 2007. godini dešavale su se brojne sportske aktivnosti od kojih ističemo sljedeće:

- Manifestacija izbora sportiste godine (januar 2007. godine),
- Sportska takmičenja po osnovnim i srednjim školama (od marta do kraja maja 2007. godine),
- Turnir u šahu u saradnji sa šahovskim klubom,
- Tradicionalni turnir u malom nogometu „Nesib Malkić“ u Dubravama,
- Tradicionalni turnir u nogometu “Džemal Mešanović-Džo“ u Bašigovcima,
- Bokserski turnir u Gradskoj dvorani,
- Karate turnir u Gradskoj dvorani,
- Košarkaški turnir „Bebe i Džons“ u Gradskoj dvorani

Osim aktivnosti manifestacijskog i turnirskog karaktera naši sportski klubovi iz raznih grana sporta redovno su se takmičili u svojim ligaškim takmičenjima i ostvarili solidne rezultate. Općina Živinice je finansijski pomagala klubove putem Sportskog saveza kroz pokriće troškova kotizacije, trenažnog procesa u sportskoj dvorani kao i direktnim izdvajanjem sredstava pojedinim klubovima u skladu sa definisanim pozicijama u budžetu. U 2007. godini općina Živinice je u oblast sporta uložila 262.653,15 KM. Ova sredstva su dodijeljena Sportskom savezu i klubovima. Osim toga u sportsku infrastrukturu uloženo je 189.323,02 KM. Ova ulaganja odnose se na izgradnju sportskih poligona u MZ Barice, pored osnovnih škola u Živinicama Gornjim i Podgajevima, pored sportske dvorane izgrađeno je sportsko igralište sa umjetnom travom a izvršena je i adaptacija svlačionica na stadionu Slavena.

Iz svega navedenog može se zaključiti da je općina Živinice u 2007. godini učinila značajne napore da sportistima i sportskim radnicima stvori povoljne uslove za bavljenje sportom i potpunije zadovoljavanje potreba građana u ovoj oblasti.

XVI ZDRAVSTVO

U oblasti zdravstva općina je svoje aktivnosti usmjerila na ostvarivanje svojih zakonom definisanih nadležnosti u ovoj oblasti. Ta nadležnost se odnosi na omogućavanje obaveznih imunizacija stanovništva i određivanje ljekara za utvrđivanje uzroka smrti izvan zdravstvene ustanove. Vršenje ovih poslova općina Živinice je posebnim odlukama povjerila JZU “Dom zdravlja“ Živinice s tim da općina snosi troškove zdravstvene ustanove koji nastanu vršenjem tih poslova. U 2007. godini izvršeno je 8.331 vakcinisanja i 214. utvrđivanja uzroka smrti izvan zdravstvene ustanove.

Najveći dio potreba u oblasti zdravstvene zaštite građani općine Živinice zadovoljavaju u JZU „Dom zdravlja“ Živinice koja raspolaže takvim materijalnim i kadrovskim potencijalom da te potrebe može u najvećoj mjeri i zadovoljiti. Ova ustanova iz godine u godinu nastoji svoje usluge podići na viši nivo ulažući sredstva u savremenu opremu i edukaciju zdravstvenih radnika. U 2007. godini realizovane su aktivnosti na otvaranju ambulanti porodične medicine u Dubravama Gornjim i Svojatju kao i područne ambulante u Višić Donjoj. Kad je u pitanju nabavka nove opreme u toku 2007. godine nabavljen je 1 ultra

zvučni aparat, 1 sonda za UZ aparat-kolor, 6 računara, 1 audiometar sa timpanometrom, 3 EKG 6/12 , 1 aparat za dijalizu, 1 spektrometar, 1 stomatološka stolica, 1 mamograf a u funkciju je stavljen i lift za dijalizu.

Osim u „Domu zdravlja“ građani imaju mogućnost da svoje zdravstvene potrebe zadovolje i uslugama privatnog sektora u ovoj oblasti koji takođe pruža raznovrsne mogućnosti.

XVII JAVNOST I TRANSPARENTNOST RADA

U prošloj godini, nastavljena je kontinuirana praksa kompletnog javnog prenosa na Televiziji Živinice sjednica Općinskog vijeća, te informisanje građana o svim važnijim događajima, radu Kolegija Općinskog vijeća i Općinskog načelnika i drugim pitanjima od značaja za građane. Takođe su Načelnik i šefovi općinskih službi imali otvorene i kontakt emisije u određenim terminima tokom godine, gdje je javnost i naši građani informisani o raznim aktivnostima, problemima, a odgovarali smo i na direktna pitanja građana. Na zahtjev grupa građana, interesnih zborova i mjesnih zajednica održavali smo sastanke na terenu i često rješavali probleme nakon neposrednog uvida u stanje na licu mjesta.

Za sva važna pitanja za našu općinu, grad i građani kao što su razvojni i regulacioni planovi, izmjene i dopune važnih normativnih akata, općinski Budžet, važniji projekti i investicije, organizovano je 61 javna rasprava.

Bez obzira na ovakav ambijent, činjenica je da je odziv građana ove vrste rasprava, slab što ukazuje da naši građani još uvijek nisu svjesni da se mogu aktivno uključiti u odlučivanje o najvažnijim pitanjima društvenog značaja.

Za sve javne radove raspisivan je tender, a izbor najpovoljnijeg ponudjača vršen je isključivo komisijski i uz javno otvaranje ponuda.

Za sve nabavke energenata, računara i opreme, kancelarijskog materijala, čak običnog papira, takođe je raspisivan tender, a izbor najpovoljnijeg ponudjača vršen po istom principu, potpuno u skladu sa Zakonom o javnim nabavkama.

Za sve ugovore i sporazume, koji se tiču bilo kakvih finansijskih sredstava, prethodno sam konsultovao Općinskog pravobranioca i kada god je zakon to nalagao, on je na njih dao svoju saglasnost.

Sve prodaje općinskog zemljišta, kao i druge općinske imovine vršio sam isključivo javnom licitacijom, a sva rješenja o dodjeli donijelo je isključivo Općinsko vijeće.

Sve moje važnije odluke i rješenja objavljene su u “Službenom glasniku općine Živinice”.

Termin za prijem građana je utorkom a u toku protekle godine, po evidenciji primio sam ih preko 1 000, često i van planiranog termina.

Važno je napomenuti da je dodatni podsticaj javnosti i transparentnosti rada u općini Živinice napravljen usvajanjem Odluke o utvrđivanju uslova i kriterija za imenovanja u regulirane organe (nadzorne odbore) i Odluke o kriterijima i vrednovanju prioriteta za realizaciju projekata u mjesnim zajednicama i anketi kao metodi ispitivanja mišljenja građana.

Iako je reemitovanje cjelokupnog toka sjednica Općinskog vijeća odraz transparentnosti uzet ću sebi za pravo tvrdnju da je u protekloj godini upravo taj faktor uticao na neefikasnost u radu Općinskog vijeća. Samo zbog toga što se sve prenosi televizijski, neki od vijećnika su često zaboravljali i predmet rasprave i dnevni red, pretvarajući sjednicu Općinskog vijeća u političku pozornicu, što je svima nama otežavalo normalan rad. Smatram da zbog veće efikasnosti u radu Općinsko vijeće treba da preispita opravdanost i racionalnost reemitovanja cjelokupnog toka sjednica koje drže prikovane za stolice ne samo vijećnike i

predstavnike izvršne vlasti već i ogroman broj naših građana koji se iscrpljuju cjelodnevnim programima reemitacije sjednica.

XVIII ZAKLJUČAK

Protekla 2007. godina za općinu Živinice bila je godina u kojoj je nastavljen trend razvoja. Ostvarili smo zacrtane ciljeve i time upotpunili razvojnu viziju naše općine. To znači da se i dalje uspješno nosimo sa svim izazovima i teškoćama društva u tranziciji, sa obavezom da provodimo promjene i aktivno učestvujemo u započetim reformama.

Nastavili smo da jačamo organizacione, prostorne i informatičke kapacitete općine kao neophodan uvjet za uspješno pružanje usluga našim građanima. Poseban akcenat stavili smo na drugačijem odnosu prema ljudskim resursima i upravljanju ljudskim resursima. Na tom planu smo postigli početne uspjehe i stvorili uvjete da općinska administracija u narednom periodu u potpunosti odgovori postavljenim zadacima i obavezama.

Nastojali smo da se u svim značajnijim pitanjima za općinu konsultujemo sa našim građanima putem javnih rasprava, informativnih i drugih zborova, kroz prijem stranaka, sastanke sa predsjednicima i članovima savjeta MZ-a, građevinskim odborima in a druge pogodne načine. Neizostavno je da pomenemo i podršku općinskog vijeća, kao predstavničkog tijela građana, koje je imalo svoju vrlo pozitivnu ulogu u navedenim procesima. Poštovali smo načela transparentnosti i javnosti, kako u procesu donošenja tako i u procesu implementacije tih odluka, programa i projekata. U tom cilju saradivali smo i sa lokalnom televizijom, radijskim i TV stanicama od lokalnog i šireg značaja.

Realizirali smo mnogo projekata koji u suštini utiču da život naših građana bude kvalitetniji. Sa ograničenim budžetskim sredstvima, racionalno i ekonomično ih koristeći, saradujući sa općinskim vijećnicima i našim građanima, uspjeli smo realizirati vrlo vrijedne projekte koje sam općinski budžet ne bi mogao podnijeti. Radeći tako ispunili smo naših obećanja da ćemo se truditi da ujednačimo razvoj općine na svim njenim područjima i da život na selu približimo životu u gradskim uvjetima. Posebnu smo pažnju posvetili razvoju do sada manje razvijenih općinskih područja u koja smo ulaganja vršili u potpunom iznosu iz općinskog budžeta, čime smo osigurali inicijativu da se i građani sa tih područja uključe sa svojim prilozima u rješavanju infrastrukturnih projekata.

Proces odabira projekata prošao je potrebnu proceduru, počevši od javnog poziva za kandidovanje projekata, preko izbora izvođača radova pa do okončanja samih poslova na konkretnoj izgradnji predmetnih objekata. Želimo napomenuti da je u tome ispoštovana zakonska procedura, općinski propisi, kao i Zakon o javnim nabavkama BiH.

Nastavili smo aktivnu politiku na polju prostornog planiranja, urbanizma i stambeno-komunalne oblasti. Takođe smo sistemski pristupali radovima na komunalnoj infrastrukturi i tokom cijele godine istu održavali u stanju za normalno funkcionisanje.

Boračka populacija je područje naše posebne brige bez obzira na ograničene mogućnosti i nadležnosti općine u toj oblasti. Naša pomoć nije izostala u velikom procentu za one koji su je od nas tražili ili dobivali na našu inicijativu. Nismo zadovoljni Pravilnikom koje je nadležno kantonalno ministarstvo za pitanja boraca donijelo, jer smatramo da ono jeste uspostavilo pravni okvir, ali nije obezbijedilo pravdu.

Raseljena lica na području naše općine još su prisutna, iako je prošlo toliko vremena od uspostavljanja mira i njihov povratak bio je realno moguć. Smatramo da nadležne vlasti na većim nivoima nisu obavile svoj posao i moralno nisu bile na visini zadatka koje su trebale obaviti. I dalje se trudimo biti dobri domaćini toj zaista vrlo ugroženoj populaciji stanovništva.

U oblasti privrede možemo reći da bilježimo trend rasta i da je prelazak sa "općine sa industrijom na zalasku" u poduzetničku općinu sa dinamičnim razvojem uspješno izvršen.

Ostaje nam obaveza da i dalje budemo na usluzi našim privrednim subjektima, gdje naši građani ostvaruju uslove za egzistenciju sebe, svojih porodica i općine u cjelini.

Naše opredjeljenje za razvoj sektora poljoprivrede neupitno je i bićemo protiv bilo čijih nastojanja koja budu imala za cilj skretanje sa ovog razvojnog pravca. Poseban naš interes je da zemlja pripada ovim ljudima-našim građanima, koja je uostalom njihova djedovina.

Obrazovanje funkcionira po ustaljenom redu, značajnijih promjena u ovoj oblasti nema, ali se i dalje ispoljavaju poteškoće vezane za prostorne i materijalne uslove u kojima nije došlo do značajnijeg poboljšanja.

Zdravstvene usluge pružaju se putem Doma zdravlja i mreže područnih ambulanti čime su zadovoljeni osnovni zahtjevi naših građana.

Općina bilježi napredak na polju sporta što se posebno odnosi na kolektivne dvoranske sportove. Naša ulaganja u sport pored razvoja zdravih mladih ličnosti utiču i na smanjenje ovisnosti svih vrsta, u prvom redu narkomanije. Iako angažman u borbi protiv ovisnosti samo na ovom polju nije dovoljan, smatramo potrebnim i dalje ulaganje u bazu sporta kao svojevrsnu prevenciju bolesti ovisnosti. Česte su sportske manifestacije na kojima smo u protekloj godini imali veći broj mladih takmičara, te smo na taj način ispunjavali opći interes u sportu.

Nastaviću praksu da ovaj izvještaj umnožimo na najjeftiniji novinski papir i dostavimo u svaku kuću, svaki stan našim građanima, kako bi svojim primjedbama, prijedlozima i sugestijama doprinijeli kvalitetnijoj realizaciji programa rada načelnika za tekuću godinu, kao i ukupnom napretku demokratskih procesa u građanskom društvu.

Živinice idu dalje.

OPĆINSKI NAČELNIK

mr.sci.Hasan

Muratović, s.r.